

朝邑縣志注

地 170.155
274.1
新

地 153.43
274



朝邑縣志注卷二

五泉山人韓邦靖汝慶父撰

長春外史張我華元觀父注

名宦第五

朝邑幅員不及二百里

縣南北九十五里東西五十里環境不足三百里者
十里二百疑應作三百

東有鹹灘

鹹讀若減鹽生之名今人作鹹鹼鹵之凝箸味最下
者灘自縣東北小伏坡厓下南至長春宮厓下東屬

朝邑縣志注

卷二

名宦一

長春外史

於河

西有鹽地凹

西自大荔縣來東過上下秦大平通潤諸邨以及於
小伏坡邨西蓋卽古所謂通靈陂者凹宜作窳汚衰
下也土人讀去聲

南有沙苑皆不可耕可耕者纔十分之二三耳而又界
河渭漆沮三水者歲溢而善崩溢輒沒禾稼崩乃數十
年不得田

沙苑見上總志注善崩言憲崩也

以故朝邑民獨貧少生業夫其和來安養獨在縣官耳



縣官治績顯者洪武中則有縣丞卞禮宏建百規開先來者

縣官明制知縣一人正七品丞一人正八品主簿一人正九品其屬典史一人編戶不及二十里者丞簿並裁禮後萬歷十年丞裁

成化中則有知縣李英然英善修舉喜用民當其時聲名籍甚去之日民莫能思也宏治中則有知縣蘇槃廉謹不擾庶幾良吏近時則有知縣衛傑菲惡自持取與峻潔他無錄焉若夫元氏以往其或治績莫考而名氏猶存苟非聞人碩士必其遺愛不忘用並書之以垂不朽而教諭翟方附焉

朝邑縣志注

卷二

名宦二

二

長春外史

明洪武二年天下縣置儒學教諭一人未入流英槃傑方皆祠名宦

晉歐陽建字堅石渤海人爲朝邑尹

建世爲冀方右族雅有理思才藻美瞻擅名北州時人爲之語曰渤海赫赫歐陽堅石辟公府歷山陽令尚書郎馮翊太守甚得時譽建石崇外甥與趙王倫有隙及孫秀求崇妓綠珠不得乃勸倫誅建崇建崇亦陰勸淮南王允齊王冏以圖倫秀秀遂矯詔收崇建建遇禍年三十餘臨命作詩文甚哀楚晉時縣不

名朝邑亦未嘗置尹蓋晉時縣爲馮翊郡治建曾爲郡太守或以此譌與

唐劉幽求冀州武強人爲朝邑尉

幽求聖歷中舉制科中第調閬中尉刺史不禮棄官去久之授朝邑尉臨淄王入誅韋庶人預參大策是夜號令詔勅一出其手以功授中書舍人參知機務爵中山縣男睿宗立進尚書右丞徐國公景雲二年以戶部尚書罷政事不旬月遷吏部拜侍中加賜實封二百戶並前封共九百戶子子孫孫傳國無絕特免十死銘諸鐵券以傳其功先天元年爲尚書右僕

朝邑縣志注

卷二

名宦三

三

長春外史

射同中書門下三品監修國史中書令崔湜等附太平公主有逆計幽求與右羽林將軍張暉定計使暉說元宗請督羽林兵除之未發事漏睿宗以幽求等屬吏劾奏以疏閒親罪應死元宗密申右之乃流幽求於封州暉於峰州明年大平公主誅即日召復舊官知軍國事還封戶賜繡衣一襲開元初進尚書左丞相兼黃門監俄以太子少保罷姚崇素忌之奏幽求鬱快散職有怨言詔有司籥治宰相盧懷慎等奏言幽求輕肆不恭失大臣體乖崖分之節翌日眨睦州刺史削實封戶六百遷杭柳二州恚憤卒于道年

六十一贈禮部尚書諡曰文獻六年詔與蘇瓌配享
睿宗廟廷建中中追贈司徒我華按幽求卒于道今
縣東北洿浴堡乃有幽求冢王河汀學謨疑冢爲後
漢孔僖墓又云本義冢迄無定說余聞長老言往河
崩洿浴岸圯並壞冢中有石柱四結以鐵鎖如杲恩
狀鎖上大棺一具丹漆如新有好事者啓視惟兜鍪
金甲旁一短柄金瓜別無他物蓋葬衣冠處惜不能
確知爲劉公否然至今冢旁有掘土者居人輒不安
時人神異之唐武德元年改書佐曰縣尉尋改曰正
七年改縣正復曰尉上縣尉二人從九品上

朝邑縣志注

卷二

名宦四

四

長春外史

季邠

闕

爲朝邑尉

邠下闕數字季邠唐書無考王河汀

學謨

作李邠云

宗人雍王之後爲朝邑員外尉雍王李繪太祖第五
子於高祖爲從父仕隋江夏總管八世有邠九世有
邠然宗室表邠官陝府左司馬邠官澄城主簿俱未
尉朝邑然二先生所書必非無據非淺學所能知
畢縣令名次莫考

唐志上縣令一人從六品上畢河南人乾寧四年爲
朝邑令會同州軍叛亂絜其妻竇氏竄望仙里旣夕
盜作仇家乘亂捽令首必死之令妻以身蔽捍被重

傷猶不置令竊隙逃匿而免里人列狀於府齎之酒帛司空圖爲作竇列婦傳然則畢本聞亂棄城添於守土之義者固無足錄獨以妻竇捍難忘身瀕死不撓可以愧天下之爲丈夫而愴卒失守者

元成好德顏英俱朝邑知縣

好德增修廟學英重葺縣治元制縣皆置尹此曰知縣未詳

大明卞禮闕洪武中爲朝邑縣丞

禮下原闕三字

李英河南祥符縣人成化中爲朝邑知縣陞去

朝邑縣志注

卷二

名宦五

五

長春外史

英以舉人成化十七年至館舍壇鋪多所繕治

蘇槃河南南陽縣人宏治中爲朝邑知縣罷去

槃字德新以舉人宏治六年任厚學子月給燈油資夜誦一日漏下偕門童步橫舍稽勤惰適遇學人羣而角戲不意卒至槃親執其兩人譙讓久之乃去出學門聞書聲喜曰小生不當如是邪吾行學不見一人攻苦獨有此幼學耳詰旦給燈油於是諸生媿感焉居九年以大計去公論惜之其來也爲對一聯以見志曰牢立脚跟要做一場循吏緊縛肚皮甘爲百歲窮人其廉謹可知矣

衛傑山西夏縣人正德五年爲朝邑知縣致仕去

聞之長老云傑以舉人任行縣不攜里長以市餅自給渴則飲於途它日有婦人汲水過青衣酌而飲之雖無威儀然所謂非惡自持取與峻潔非溢美矣

翟方山西榆次縣人成化中任儒學教諭善教朝邑科目成化中獨盛甲午科舉六人庚子科舉五人

方由舉人任六人郭鼎張磬韓紹宗劉永張珣梁文盛五人李貞蕭鵬周瑄仇昉李夔

人物第六

賢人長者懿德美行湮沒多矣豈不惜哉

新市鎮有張氏者其先元功臣張柔之後也柔以功封安肅公加封汝南王諡忠武柔子宏政宏範範子

珪今皆有象

我華

猶及見之柔象不書銜宏政象書

都總管宏範象書銀青榮祿大夫平章政事漢軍都元帥封淮陽王珪象書銀青榮祿大夫平章政事蔡國公柔宏範珪功勳見元史列傳而志未及錄不寧惟此繼美如漢之嚴翰林清德如隋之鉗耳文徹世爵如北朝嚴稚玉協司業至唐不替孝友如嚴士良

朝邑縣志注

卷二

人物一

七

長春外史

忽麒忠義如別修誅討祿山善吏如郭均王楫樊資箸績元世勤能如侍郎王良廣愛如張九成上義如寇福輸粟千石濟饑李珩劉十九輸粟五百石咸邀旌表建坊立石奇遇如席彥才者以老人進香文皇奇其狀貌且善應對授行在戶部主事滿考稱典幹予承德郎若夫程編修濟妻之智烈子廉之奇技不愧爲編修之妻若子矣其他或名存跡沒或本無足紀而散見於史傳集錄不知凡幾若數子者誠不啻一鄉之善士而志且逸之惜哉之歎蓋傷文獻之不足書闕有閒也

蓋宏治中沮水齧趙氏墓墓崩有石曰皇慶二年旌表孝子趙良

皇慶元仁宗年號二年歲在癸丑

漢籍少公嘗脫郭解于厄吏人踪跡至少公少公乃自殺以滅口

解軹人也字翁伯善相人者許負外孫也解爲人短小精悍不飲酒少時陰賊慨不快意身所殺甚衆以軀借交報仇藏命作姦剽攻不休及鑄錢掘冢固不可勝數適有天幸窘急常得脫若遇赦及解年長更折節爲儉以德報怨厚施而薄望然其自喜爲俠益甚及徙豪富茂陵也解家貧不中訾吏恐不敢不徙衛將軍爲言郭解家貧不中徙上曰布衣權至使將軍爲言此其家不貧解家遂徙諸公送者出千餘萬軹人楊季主子爲縣掾舉徙解解兄子斷楊掾頭已又殺楊季主楊季主家上書人又殺之闕下上聞乃下吏捕解解亡置其母家室下陽身至臨晉臨晉籍少公素不知解解冒因求出關籍少公已出解解轉入太原所過輒告主人家吏逐之迹至籍少公少公自殺口絕

嚴譏唐則天時爲詳審使活死囚八百餘人罷疑獄百

人又原不實者千餘姓譏善風角繼李淳風爲太史令
占熒惑入與鬼及諸張敗及諸陵墓事俱驗譏子向爲
鳳翔尹有政聲

詳審使無常員風角占四方之風以知事也李淳風
岐州雍人明步天歷算著法家書七篇上之累官太
史丞遷爲令譏麟德歷唐太史監或改局或改秘書
閣渾天監渾儀監改復不常令或改郎中或改監或
復爲令唐志鳳翔府尹一人從三品嚴善思名譏同
州朝邑人以字行父延與河東裴元證隴西李真蔡
靜皆通儒術該曉圖讖善思傳延業褚遂良上官儀

等奇其能高宗封泰山舉銷聲幽薺科及第調襄陽
尉居親喪廬墓因隱居十年武后時擢監察御史兼
右拾遺內供奉數言天下事方酷吏構大獄以善思
爲詳審使平活八百餘人原千餘姓長壽中按囚司
刑寺罷疑不實者百人來俊臣等疾之誣以罪譴交
趾五歲得還是時李淳風死候家皆不效乃詔善思
以箸作佐郎兼太史令聖歷二年熒惑入與鬼后問
其占對曰大臣當之是年王及善卒長安中熒惑入
月鎮星犯天關善思曰法當亂臣伏罪而有下謀上
之象歲餘張柬之等起兵誅二張遷給事中后崩將

合葬乾陵善思言合葬非古漢世皇后別起陵墓魏
晉始合葬漢積祀四百魏晉祚率不長亦其驗也今
若更擇吉地附近乾陵取從葬之義使神有知無所
不通若其無知合亦何益中宗不納神龍中遷禮部
侍郎表皇后擅政爲社稷憂求汝州刺史嘗語姚崇
曰韋氏禍且塗地相王所居有華蓋紫氣必位九五
公善護之及睿宗立崇以語聞召拜右散騎常侍初
譙王重福徙均州過汝善思爲刺史及謀反僞除禮
部尙書重福敗坐關通論死吏部尙書宋璟戶部郎
中李邕薄其罪給事中韓思復固請乃流靜州始善

思爲御史中書舍人劉允濟爲酷吏所陷且死善思
力訟其寃得免戶部尙書王立本見之曰祁奚之救
叔向嚴公有之後見允濟語未嘗及之思復之解善
思也亦不自德時稱長者之報後遇赦還開元十六
年卒子向乾元中爲鳳翔尹三世皆年八十五云
申屠思恭呂昂郭觚張元亮唐書云事親居喪箸異行
者

新唐書孝友序傳自萬年王世貴以下第八縣有朝
邑申屠思恭呂昂無郭觚張元亮名呂昂下卽曰鶉
觚張元亮靈臺孫智和始悟五泉先生所見本譌鶉

爲郭遂以縣名爲人姓名並收張元亮于縣也再考唐書地理志無鶉觚縣由天寶元年改鶉觚爲靈臺也然則元亮開元以前人故繫之鶉觚智和天寶以後人故繫之靈臺無可疑者異行唐書作孝行唐書爲是

元趙良孝子

元史孝友列傳其居喪廬墓者則有同州趙良

王亨爲縣幕官亨孫由義至禮部侍郎歐陽元王氏世德序曰亨爲縣幕官持守端楷每與時尚同異遂棄去不仕由義爲徽政院都事能抑內侍節浮費爲御史累朝邑縣志注

卷二 人物五

十一

長春外史

有獻替從幸上京抗章論衛士縱牧踐民田行營無敢犯者又與時相爭江西行省戰功至相震怒不爲動

元縣置典史二員當時謂之幕官元志禮部侍郎二員正四品歐陽元字原功瀏陽人延祐二年賜進士出身授岳州路平江州同知調蕪湖尹改武岡召爲國子博士陞監丞遷翰林待制兼國史院編修官天歷二年授藝文少監纂修經世大典陞太監元統元年拜翰林直學士修四朝實錄兼國子祭酒陞侍讀學士修遼金宋三史爲總裁官至正五年拜翰林學士承旨進階光祿大夫十七年卒年八十五贈楚國

公謚曰文元三任成均兩爲祭酒六入翰林三拜承旨修實錄大典三史屢主文衡兩知貢舉及讀卷官凡宗廟朝廷雄文大冊多出元手海內名山大川釋老之宮王公貴人墓隧之碑得元文辭以爲榮有圭齋文集若干卷行世同異碑作異同徽政院先爲詹事院本東宮官至元三十一年改爲徽政院此後罷設不常至天歷二年改爲儲政院然無都事其屬章慶使司有都事二員而不言所掌至大三年立至治三年罷上京卽上都今承德府由義元史無傳行事詳總志王由義墓注

朝邑縣志注

卷二

人物六

三

長春外史

大明高翔程濟楊景學馬仲昌洪武中俱以明經徵洪武中嘗論禮部經明行修練達時務之士徵至京師以翰林六部及布按兩司用之

翔有文學節行爲監察御史高皇帝甚眷注翔翔所論奏無不關國家機事當上心者革除閒文皇帝素聞翔名翔將大用之會翔服喪服入見語又忤旨乃殺翔族其家沒入其產諸給高氏產者皆倍其稅曰以世世怒罵御史也御史親戚皆配爲軍

明史職官志都察院十三道監察御史一百十人正七品翔明史附胡閏傳續藏書曰文皇族翔又發翔

先墓雜犬馬骨焚灰揚之而以其地爲漏澤園嘉靖三年知縣郜公相建高先生祠堂苑洛先生爲碑記曰先生姓高諱翔洪武中以明經拜監察御史靖難之師至江上先生遂革除之義云邦奇自爲兒童時往往聞父老稱說先生事感慕咨嗟輒泣下數行顧以文典未徵徒識於心未敢稱述會見侍御張君芹備遺錄載先生姓名官稱適五泉大夫韓邦靖爲朝邑志爰命次序先生事於書而先生之事始白於人矣當洪武時高皇帝甚眷注先生先生所奏事無不關國家幾事當上心者及革除文皇帝素聞先生

乃召先生欲用之先生以衰服見語又乏膚敏左右遂兵之嘉靖元年冬郜侯來尹吾邑樂節慕古咨詢文獻惟日孜孜邦奇乃以先生語侯侯曰嗟乎世俗之蔽也久矣計利者忘義謀家者負國孰有殺身成仁如先生者哉夫當革除時變通之士比之惟初受他吉者多矣而過涉滅頂先生乃蹈之夫褒死者所以勸生者起頑懦而激民風相之責也乃建祠肖象於五衢之地俾過者居者咸有式焉事竣乃屬邦奇爲文勒之石夫先生之沒至今百五十餘年而表樹之典始興於今日者豈前人好德之心或有間歟徒

以先生爲主之忠發於吠堯之節故論者往往以爲非時之宜耳昔者武王孟津之會順天應人夷齊乃叩馬而諫使當時非太公之言則夷齊亦刃下人也其後亦竟餓死於首陽之阿千百世之下武王不失爲聖夷齊不失爲賢然則祠先生者又何過焉練子寧方孝孺張鷟庵與先生同事者也子寧祠於江西孝孺祠於台州鷟庵祠於富平又永樂時有朝貴變姓名爲子寧諱者文皇聞之曰使子寧在朕固當用之於是乎見聖人之本心矣然則祠先生者又何過焉苑洛先生此記用典遣辭悉有權衡當時不得不

如此也碑邑生員趙瓘書瓘學平原書可謂登魯公之堂者此碑更端重峻潔有劔拔弩張之勢方之多寶塔碑不啻優孟衣冠真足以發高先生之氣張苑洛先生之軍矣不知何時碑折爲三且逸其下截其上二截在文廟忠孝祠廡下是年八月邑人請於華陰屈西溪直作郃公創建表忠祠碑記直五泉先生妻父舉進士終副都御史記專歸美郃侯能表章前烈及其歷官政事之績故不錄碑亦瓘書較前碑多收斂而道勁過之乾隆五十七年我華監修西河書院以前庭爲高程二先生享堂龕二碑及雷慕庵雙

忠祠記碑于堂壁我華有記紀其事

濟有法術爲四川岳池縣學教諭岳池去朝邑數千里濟寢食俱在朝邑而日治岳池學事不廢革除閒上書言某月某日西北方兵起朝廷以爲非所宜言繫至京召入將殺之濟叩頭曰陛下幸囚臣期而無兵臣死未晚也遂繫濟詔獄已而兵果起乃赦出濟更以爲軍師護諸將北行與靖難軍先鋒戰於徐州大捷會曹國公師退文皇帝至江上濟逃去不知所終始徐州捷時諸將乃樹碑載戰伐次第及統軍者姓名濟一日夜往祭碑人莫測其故後文皇帝過徐州望見碑顧左右曰碑朝邑縣志注

卷二

人物九

五

長春外史

者何也或以狀對上大怒趨左右椎碑一再擊遽曰止爲我錄碑來乃按碑族誅諸將無得脫者濟姓名正用擊處得免濟曩者之祭蓋禳之也

濟蔡家堡人後人改姓成今縣東諸成皆其後也岳池今屬順慶府徐州府今屬江蘇布政司曹國公李景隆也明史附濟於牛景先傳後續藏書曰建文旣赦濟以爲翰林編修充軍師護諸將北行及淮上諸將敗建文乃召濟還京師濟初與同邑人高翔並以明經徵翔厲名節濟好術數翔止濟勿爲此濟不聽已而有兵事濟又勸翔學我術翔曰我願爲忠臣也

金川門破翔召濟同死濟曰我願爲智士也翔竟死
建文急召濟入問計濟曰天數已定唯有出走免難
耳立召僧爲建文落髮濟從走每遇險濟輒以術脫
去相從數十年後隨建文至南京人尙識濟至京莫
知所終王河汀學謨曰濟子廉善槍文皇嘗稱成國
公槍法後知有廉召與成國校併於殿庭廉進退敏
妙成國弗能當也上心賞其能命爲錦衣衛千戶子
孫至今猶有存者又曰高公殺身成仁義不苟生程
公以術全君義不徒死均之爲社稷耳今高公有祠
宜與程公並祀乃見同道之義云萬歷十六年知縣
朝邑縣志注

卷二

人物十

六

長春外史

郭公實改表忠祠爲雙忠祠祀高程兩先生苑洛先
生外孫御史雷慕庵士禎記其事初濟妻某氏新歸
後舅姑相繼歿盡出衣裝管葬及夫教諭岳池以榮
惑守心將疏論之諫曰天道渺茫未可盡信君非司
天柰何越職言事夫卒言之逮繫氏隨至京金川門
破夫謂之曰我將顧君不能顧汝矣對曰勢不得已
計在一死不以爲君累夫旣入官遂以所繫縑縊死
楊景學縣丞

中曲里人布政使恭父江西撫州府金谿縣
馬仲昌大理寺左寺丞

沙底里人明志大理寺左寺丞一人正五品
李濟樊冕蕭斌劉讓上志韓家君名馬驥王香房瑄韓
邦奇韓邦靖牛斗王朝塗俱登進士

濟冕洪武二十九年舉人濟洪武三十年韓克忠榜
進士冕進士未詳斌正統九年舉人十年進士讓志
景泰四年舉人讓成化二年羅倫榜進士志天順元
年黎淳榜進士韓家君名五泉先生父紹宗也成化
十年舉人十四年曾彥榜進士驥成化十三年舉人
二十年李旻榜進士香成此七年舉人宏治三年錢
福榜進士瑄宏治二年舉人與香進士同年邦奇宏
朝邑縣志注

卷二

人物十一

七

長春外史

治十七年舉人正德三年呂柟榜進士邦靖宏治十
四年舉人與兄邦奇進士同年先是巡按在南門上
考取童生入大場謂之儒士能畢三場准予生員有
以儒士中式者五泉先生邦靖也不知何時停其法
然先生文止五藝又不知何時科場加嚴斗與邦奇
同舉鄉試正德九年唐臯榜進士朝塗正德十一年
舉人十二年舒芬榜進士

李濟官至左副都御史一統志云濟才敏學優歷官守
法

懷恩里人明志都察院左副都御史正三品

樊冕官至河南參政先爲都給事中吏部擬冕戶部侍郎英廟方嚮冕曰樊冕豈戶部邪可吏部侍郎無何英廟晏駕乃不果用

北石邨人明洪武九年置布政司左參政從二品十三年改從三品無員數分守各道洪武三年設六科各都給事中一人正七品戶部侍郎左右各一人正三品吏部侍郎左右各一人正三品英廟天順八年崩上距洪武二十九年共六十八年冕年且近百歲矣

蕭斌至通政管易州柴敞保定府志稱其廉謹自守

朝邑縣志注

卷二

人物十二

六

長春外史

喜慶里人洪武三年置察言司尋罷十年置通政使司有左右通政各一人正四品易州保定俱隸直隸布政司斌宅心公恕事不避難門無私謁王河汀

學

謨

曰初斌以嬰孺患痘疹死家人斂以小樽投之河榜人張某者數夢老父追呼救人覺而兒啼樽中白蕭氏至今官棄稷棄冰上生豈虛乎哉張我華曰今嚴伯蕭爾元秀才斌之孫也以財雄於鄉明德有後宜哉

劉讓至知府讓有氣先爲戶部主事監太倉與內侍爭席相惡乃謫東萊通判後爲永平府同知永平府志稱

其剛斷

親賢里人四川夔州府明初改諸路爲府設知府一人正四品同知正五品通判正六品同知通判俱無定員戶部十三清吏司各設主事一人正六品先是洪武中置軍儲倉永樂中置京倉及通州各倉以戶部司員經理之東萊宜作萊州府隸山東布政司永平府隸直隸布政司

韓家君名至福建按察司副使

明志提刑按察使司有副使正四品無定員

上志馬驥俱知縣

朝邑縣志注

卷二

人物十三

七

長春外史

志孚佑里人河南嵩縣驥懷恩里人山東汶上縣山東通志驥祠名宦中廉明方正人不敢干以私有所可爲不避當道竟以此去官人至今冤之王河汀學謨曰於乎當道者安在廉明方正驥之名不朽矣王喬至郎中侗儻任豪數有論奏

孚佑里人字汝器授戶部主事出掌錢穀於古北口觀潮河川難守乃上禦戎策敬皇不果行旣而請理京衛牧馬草場畜牧事宜當是時房山豪民侵牧地喬檄涿州知州按驗知州不敢問謝去喬自按之且急豪民有奧援喬不顧曰法如是也除本部員外會

詔求直言疏列五十餘事尋陞本部郎中督儲遼東
又條奏邊儲戰陣方略過山海關憲臣以誘殺勘邊
士罪奪奏實非誘殺急行功賞以厲士心巡歷諸倉
輒疏便宜七事會敵入塞又請選將添兵并薦其可
任者數人兵部銜之論謫阿迷州同知南人馴服署
蒙自縣歲侵不請先發以貸饑者擢知和州辯冤抑
導水利和民戀之爲立生祠後爲蘇州府同知以直
道迂時遂免歸明志戶部十三清吏司郎中各一人
正五品

房瑄至按察使瑄先爲郎中上疏論時政時人稱焉今
朝邑縣志注

卷二

人物十四

三

長春外史

家任邱

安仁里人明太祖吳元年置各道按察司設按察使
一人正三品郎中刑部也刑部十三清吏司各郎中
一人正五品任邱縣屬直隸河間府
韓邦奇至僉事韓邦靖至員外郎皆副使韓家君名子
今俱以罪譴爲民

僉事浙江也員外郎工部都水司也按察司有僉事
正五品無定員工部都水司員外郎一人從五品罪
譴爲民正德十一年邦奇爲浙江按察司僉事奏罷
富陽等縣魚鰾茶綾歲貢鎮守太監誣奏邦奇阻絕

進貢作歌誹謗逮赴詔獄詔奪爲民正德九年邦靖
爲工部員外郎因灾異上疏言頗切直天子震怒繫
錦衣獄科道論救乃奪官爲民也五泉先生傳已見
卷首自序後苑洛先生明史有傳然殊隘陋不足發
先生之休光 我華 今多方采輯叙箸於後焉邦奇字
汝節別號苑洛子朝邑洛苑鄉人副使紹宗次子五
泉先生之仲兄也少治尙書卽箸蔡傳發明禹貢詳
略宏治十七年以書舉第二人會試不第歸箸律呂
直解見志正德三年成進士授吏部考功司主事陞
員外郎六年考察都御史私袖小帙竊視邦奇曰考
朝邑縣志注

卷二

人物十五

三

長春外史

覈公事有公籍在何以私帙爲乃掣其帙封貯不檢
都御史爲遜謝同曹郎皆縮項失色尋調文選司尙
書托意爲官擇人欲發視缺封邦奇執不可曰發則
有私諸曹咸依阿邦奇執愈厲卒不更尙書銜之未
幾京師地震上疏極論時政闕失謫平陽府通判決
滯獄倡理學號一時卓異九年陞浙江按察司僉事
所蒞疏冤雪枉抑強扶弱除貪獎廉節財愛民而不
畏權要不憚險難它時浙無巡撫統攝故賦役獨稱
煩費邦奇釐爲四科事從節縮法嚴徵散公不廢供
私不厲民歲省以百萬計後來遵承命曰韓公科條

焉逆斲錢寧託寵義子以鈔三萬錠符浙省易銀當事者斂饋如其數邦奇檄知縣吉棠散其斂卒不饋宸濠將爲逆先命內豎假以飯僧聚千人於杭州天竺寺邦奇立爲散遣濠又以儀賓託名進貢假道衢州邦奇召儀賓而詰之曰進貢自當沿江而下奚自假道歸語爾王韓僉事在此不可誑也後濠果通謀鎮守欲襲浙江賴前事發姦不竟逞十一年鎮守太監王堂借魚茶進貢爪牙四出民不聊生邦奇乃作富陽民謠曰富陽江之魚富陽山之茶魚肥賣我子茶香破我家采茶婦捕魚夫官府拷掠無完膚昊天胡不仁此地亦何辜魚胡不生別縣茶胡不生別都富陽山何日摧富陽江何日枯山摧茶亦死江枯魚始無山難摧江難枯我民不可蘇四月乃以蘇民困以保地方事奏曰鎮守太監王堂市舶太監崔瑤織造太監晁進督造太監張玉各差參隨人等在於杭嚴二府地方催攢魚鰓茶綾等貢物固已勒要收頭銀兩而不才有司官吏及糧里人等倚是貢物無敢稽察任意科斂地方被害人不聊生而四太監伴貢之物動以萬計是陛下所得者一而太監卽所得者十參隨人等所得者百有司官吏所得者千糧里人

等所得者萬利歸於私家怨歸於朝廷上供者一而下取者萬況此等之物品不甚奇味不甚美何足以供陛下之用哉建富等縣地方地瘠民貧山枯乏樵獵之饒水清鮮魚鰕之利兼以近年以來水旱相仍徵科肆出軍民困瘁已極故前歲流民相聚爲亂一呼千百幾生大變幸賴無捕而安今尙洶洶未靖往事在鑑實可寒心伏望陛下勅下該部將前項貢物特從停止庶民困可蘇而地方可保無虞矣疏入免貢鎮守太監怨之乃誣邦奇擅革進貢作歌誹謗逮赴詔獄詔奪爲民旣歸謝客講學四方學士負笈從

遊者日衆乃箸周易集說以覺來學十六年世宗立詔起爲山東布政司參議十一月以聖母駕過山東高唐州同知金波供應有缺詔錦衣衛逮捕邦奇乃上疏略曰臣聞刑者人主治天下之大防而天下治忽所由係書稱堯舜之治至於四方風動其究歸於臯陶象刑之功故刑者人主之所當重慎而不可忽者也國家法古制刑內則總之三法司外則總之按察司其法詳且盡矣近者聖母駕過山東高唐州同知金波供應有缺陛下詔錦衣衛官校拏至京師天下譁然驚疑謂聖明在上亦復有此夫金波小官何

足以動天下之聽聞而錦衣官校出京拏人則固天下聽聞之所係也伏望陛下特宥金波之罪自後在外府州縣官有犯付之按察司三司官有犯付之撫按官撫按官有犯付之三法司如此則內外相承體統不紊罪皆閱實孰可逃刑哉先是金波見逮撫按三司皆認罪及見邦奇奏皆不悅遂自陳乞休嘉靖三年以薦起山西左參議是年大同兵變巡撫都御史張文錦遇害邦奇欲入大同城去二舍逆者使人露刃來迎且言城不可入狀是夜故燒參將宅以懾之邦奇單車入城時諸司無官邦奇獨任其事約

法二條以戢暴亂幾兩月鎮城稍安十一月上遣胡侍郎提兵問罪邦奇爲之處分事宜翌日罪人斯得傳首軍門邦奇謂侍郎宜速給賞使城人畏威懷德弗聽遂復生他變矣四年再乞休歸七年起四川提學副使入爲右春坊右庶子兼翰林院修撰主順天鄉試命題迺當時權貴言者承風旨劾試錄繆誤謫南京大僕寺丞八年再疏乞歸起山東按察司副使遷大理寺丞進少卿以左僉都御史巡撫宣府至鎮謂戰馬倉糧皆邊務之首卽平市估以易馬出紅腐以足軍時大同再變王師出討百凡軍需倚辦宣府

悉心經理有備無乏十四年入佐院事進右副都御史巡撫遼東時遼陽兵變侍郎黃宗明言邦奇素有威望請假以便宜速往定亂帝方事姑息不從命與山西巡撫任洛換官至山西旌循良黜貪暴定徭役平賦斂節驛傳禁和買憲度肅然巡歷邊塞增飭戰守之具拓老營堡城垣募軍常守以代分番而邊屹然可恃在官不煩有司供具閒日出奉米易肉一斤居四年引疾歸中外交薦二十三年以故官起督河道遷刑部右侍郎改吏部二十六年拜南京都察院右都御史進南京兵部尚書參贊機務既司留筦振修百廢封植基本議保靈長五上乞身勉留皆溫語卒遂初服益修舊業倡導來學居八年三十四年地大震遂卒豈非地紀絕而哲人萎邪有識者於是乎有蒼生之憾焉訃聞贈少保賜諭祭謚恭簡明史本傳曰邦奇性嗜學自諸經子史及天文地理樂律術數兵法之書無不通究著述甚富所撰志樂尤爲世所稱西京許宗魯曰魯讀苑洛先生編年事狀乃知公學具體用非世所謂學道者比也究心於理而不立異臨事以道而不苟同進無所踰退無所疚古之所謂儒者殆庶幾焉憲學祠正學祠中

張我華曰先生外孫張士榮秀才先大夫副使公從
兄也歿先生誌其墓甚慟惜士榮子秀才可賢卽表
先生墓者與我先大夫提學公爲再從兄弟以故我
華知先生事頗詳先生著作甚富今板行者苑洛文
集二十二卷志樂十二卷正蒙拾遺一卷啓蒙意見
二卷洪範圖解一卷易占經緯四卷耳其易說二十
四卷書說二十卷毛詩未喻一卷編年事狀若干卷
板本不存先生墓在望嶽門外二里華原山頗據河
山之勝

牛斗今養親

朝邑縣志注

卷二

人物二十

三

長春外史

字應宿蔡家堡人以親老乞歸終養己乃除工部主
事嘉靖初陞兵部武選司郎中世宗詔革先朝冒濫
軍功傳陞帶俸武職無慮千數亡何冒濫者賄於當
軸乃於詔書中開黃緣之路兵部尙書力爲之地獨
難於斗而令司務廳喻意斗執不從尙書不得已名
斗於火房爲好言誘之曰此當國者意也吾與若爲
之柰何斗曰朝廷初詔號稱聖明未幾輒欲反汗其
何以示天下尙書曰彼柄政者欲之子但奉行何患
無美遷斗曰壤國紀而博好官某不爲也尙書爽而
斥之曰若老郎中也陞遠方郡守出張義門還回而

泣者有矣斗曰老先生戀戀富貴一旦失位不免飲泣若斗本寒素罷官守窮固也何哭之爲尙書愈怒幾欲扑之而不得斗因移病不視事尙書令他代署先汰革者復職如故無何出斗知萊州府又與貴勢不合致其事而歸

王朝塗今依親

依親未詳朝塗卷第三子字仲冕初授三河知縣三河閻銳故里先是知縣青衣小冒謁銳私第跽而獻贄朝塗獨不往會銳以禮來冠服及門又不官屈銳滋不悅邑富人假銳勢影射差役貧者代辦朝塗清出之且按其罪銳大怒屬意當事欲罷朝塗官適銳私人從旁解之曰縣君廉銳怒稍釋得調鹿邑沈邱盜起所在蹂躪朝塗繕城治具盜至城下三日百計攻取而朝塗極力捍禦盜退而疾不可爲矣遷宿州知州未至卒

朝邑縣志注

卷二

人物二十一

三

長春外史

韓邦靖曰宏治中教諭西蜀李君志朝邑其稱家君曰登進士仕至福建按察司副使居官有爲執法平恕閩人思之成化中爲刑部郎中朝廷有大獄擇公正官籍之僉推公初往正定再往大同曲直允合上心宏治初元上疏論時政多所允俞云

李君名益四川叙州府宜賓縣舉人宏治十七年作
邑志志未見副使名紹宗字裕後號蓮峰朝邑洛苑
鄉南陽洪人也行事見本傳有四子長鄭州知州邦
彥次苑洛先生三五泉先生四固始縣丞邦翊

楊仲貞吳埴唐葵倫楊恭王翼趙整歸儒李睿王福馬
駿王剛楊茂王孜王恪安永周道張玘王禮翟溫王質
楊禮趙衡靳能陳善雷嚴周易韓倫楊珪趙鼐劉偉靳
時熙安才孟熊郭鼐張磬劉永張珣梁文盛雷爵李貞
蕭鵬周瑄李夔仇昉于章雷霓楊煥楊友党爵東陽韓
邦彥程範王朝雍雷子質孟埴樊得仁俱鄉試舉人

朝邑縣志注

卷二

人物二十二

三

長春外史

仲貞洪武十七年華按洪武六年停科舉法至是十
年復行填葵倫二十三年恭二十六年翼永樂三年
整儒俱六年睿九年福駿剛茂俱十五年孜恪安永
道俱十八年安永時年十五歲玘王禮溫俱二十一
年質宣德十年楊禮衡俱正統三年能九年善景泰
元年巖七年易天順三年倫珪鼐俱六年偉時熙才
俱成化四年熊七年鼐磬劉永珣文盛俱十年雷爵
十三年貞鵬瑄夔昉俱十六年章霓俱二十二年煥
宏治二年由同州學舉友党爵俱五年陽十一年邦
彥範朝雍俱正德二年子質五年埴得仁俱十一年

科名考宣德七年有安仁里王昺由同州學舉馬邑
教諭以無功積謫河泊所大使蓋明初教職以任內
舉士爲一功馬邑素乏科第昺坐謫景泰四年有賀
威張泰俱由西安府學舉正德二年有安仁里翟貞
吉字元善由同州學舉授招遠知縣以廉名上四人
雖舉不由縣學皆縣人也志闕載

楊仲貞楊禮張磬仇昉俱至教授磬淳潔業尙書進士
甚精

明洪武二年詔天下府立儒學置教授一人從九品
七年又置都司儒學教授一人教武臣子弟仲貞禮

朝邑縣志注

卷二

人物二十三

五

長春外史

俱中曲里人仲貞四川重慶府禮山東東昌府磬字
中和樂豐里人王河汀學謨曰磬茂才時督學伍公
福有風鑑謂磬雖得舉三十年寒官耳後磬歷束鹿
訓導萬泉教諭遼東都司教授如其所云昉永康里
人山西平陽府

吳墳府照磨

明志府有照磨所照磨一人從九品洪武十三年六
月罷二十七年復置墳平羅里人山西太原府

唐彛倫王翼歸儒楊茂王禮靳能韓倫安才郭蘧李夔
党爵俱知縣倫剛介有行蘧治曹縣曹縣志稱其吏人

畏服

夔倫江田里人揚州府泰州如臯縣翼長春里人王

河汀學謨曰澠池教諭知縣未詳儒永康里人兗州

府滕縣茂夕陽里人平陽府蒲州猗氏縣王河汀學

謨曰茂至福建道監察御史楔綽雖壞其半有足徵

先後志俱不詳御史逸者不少矣王禮魯坡里人四

川保寧府南部縣能沙底里人由馬邑教諭陞大同

府應州山陰縣能在馬邑馬邑學有門者某少俊而

貧能令同諸子學時其衣食後又攜至縣舍恩禮有

加後門者某舉進士官陝西參議爲能豎楔綽下鄉

朝邑縣志注

卷二

人物二十四

三

長春外史

躬自存問時能已歿延能室坐上坐參議匍匐下拜
扶掖使不得荅拜後陞巡撫都御史意孜孜厚卹不
厭倫溥濟里人順天府通州武清縣以剛介稱才防
於里人河南彰德府林縣龔孚祐里人山東兗州府
曹州曹縣曹州今爲府曹縣屬焉苑洛先生三廉吏
傳有盧氏知縣郭龔字國器不茹不吐威行惠施盧
氏有礦山吏其邑者多緣以爲利公一無所取人畏
而愛之豈後又爲曹縣與夔受春里人四川夔州府
開縣党爵干邨里人山西平陽府吉州鄉寧縣調曲
沃

楊恭至陝西左布政使宣皇帝時恭謁選吏部言事稱
旨卽日召見上以恭言事有才而見又容貌偉甚乃勅
吏部與恭左布政使部尙書言左布政不缺員缺獨陝
西恭不得往上曰朱買臣獨不爲會稽耶恭奚不可陝
西遂授恭恭頓首固辭上曰吾知若辭布政矣顧陝西
鄉里撓而法耳乃令恭得便宜治事而賜免死券十道
又以子剛爲錦衣指揮始恭行時入謝知縣知縣不爲
禮旣得選乃令從者不得言布政衣故破衣納憑券破
囊中置驢上騎往見知縣知縣不知恭已得布政又爲
陝西勞之曰楊進士甚勞苦所得何官邪恭曰比知縣
朝邑縣志注

卷二

人物二十五

三

長春外史

差大耳知縣素易恭聞恭言遂怒曰若言官大豈爲布
政邪縱布政將如朝邑知縣何恭笑曰安知非布政邪
且正能治朝邑耳乃徐徐出其囊中憑券乃陝西布政
也一縣人盡驚知縣卒得罪去

明洪武九年改諸行省爲承宣布政使司罷行省平
章左右丞等官改參知政事爲布政使尋增設左右
布政使各一人秩從二品宣德三年定爲十三布政
司恭縣丞景學子蓉塘集云永樂二年以刑科都給
事楊恭爲陝西布政使王河汀

學謨

云靖難師起朝

議命曹國公統師問罪時恭爲都給事疏言宜先遣

使講和忤旨黜爲蒙自縣幕文廟卽位喜恭主和議
徵至除陝西布政居九年以廉貞終二說與志互有
不同然五泉先生必非無據也

趙整至監察御史

樂豐里人河南道

周道至僉事道中式時驛歸將渡渭一婦人從後呼之
婦人曰君騎卒妾子也妾寡居待此子以生念其當渡
渭故追視之耳道惻然舍騎步歸後爲御史征雲南夷
總兵官餽貨寶幾千金道却之又爲山西僉事有惠政
卒于官喪出民遮道哭奠三日不得行

朝邑縣志注

卷二

人物二十六

三

長春外史

受春里人授山西洪洞縣訓導陞助教擢御史至山
西僉事苑洛先生周氏世濟清忠傳有按察司僉事
道通政或從子明志征南將軍鎮守雲南總兵官一
人駐雲南府率以公侯伯都督充之

李睿不仕

長春里人王河汀

學謨

稱其高尚

王孜翟溫俱衛經歷

明京外各衛其屬經歷司經歷各一人從七品孜懷
恩里人羽林衛溫安仁里人騰驤左衛

王恪都司斷事

安仁里人河南都司明洪武八年改各都衛爲都指揮使司其屬斷事司斷事一人正六品副斷事一人

正七品

王質趙鼐雷巖楊友俱教諭

質平羅里人山西沁州武鄉縣鼐江田里人河南南陽府泌陽縣訓導轉山西澤州高平縣巖防於里人縣未詳友溥濟里人四川成都府新繁縣

趙衡陳善劉永俱訓導

衡長春里人四川成都府漢州善太奇里人山西遼州劉永防於里人山西太原府平定州樂平縣明洪

朝邑縣志注

卷二

人物二十七

三

長春外史

武中制儒學訓導府都轉運司各四人州三人縣都司行都司衛各二人位雜職上

楊珪至太僕寺丞珪喜修廉隅飾儀度上退不干教授禮子

明洪武三十年置北平行太僕寺永樂十八年以行太僕寺爲太僕寺有寺丞四人正六品正定府志稱珪知獲鹿時吏治廢弛珪銳意振作凡城郭臺池衛舍橋梁之類完舊增新規制咸備每於政暇召諸生講論經史考第課業孳孳不倦鹿之科目文物由此漸盛王河汀

學謨

曰珪初爲獲鹿知縣以廉謹稱居

三載被徵或曰盍飾儀容中科道選珪局局曰吾非不知羞而不爲也竟以二毛補太僕寺丞以憂歸服闋當逆瑾用事乃不宥起家諸里戚彊起之終不聽瑾敗濡足者多不免珪號知機杜門謝客清操益箸號清楊子孫貧婁廉吏可爲而不可爲珪有焉劉偉至知府以厚德稱先爲文水文水刁悍劇縣偉不嚴而治

文水縣隸山西太原府偉中曲里人將往文水部使者封杖與偉曰以此齊梗化者偉藏杖不用獨以誠心直道爲理久之衆庶傾心向化偉歎曰孰謂文水刁悍政恐人不宥作好官耳入爲御史出知山東兗州府卒於官

梁文盛蕭鵬至知州

明天下州置知州一人從五品文盛沙底里人由河南延津知縣陞山東莒州延津志稱文盛識見精明才幹克濟鵬字萬里江田里人新寧知縣四川瀘州四川通志云鵬知新寧刑清訟簡多箸愛民之政

雷爵張珣至府同知李貞周瑄雷寬于章俱至通判爵珣俱純篤廉謹至老不渝珣先爲通判時吏部舉天下廉有司二十人珣與焉時人榮之

雷爵防於里人苑洛先生三廉吏傳有大名府同知雷公爵字廷臣鄉試中式授保定府清苑知縣歷九年菲食惡衣常祿外無分豪取遷淮安府邳州知州又九年遷四川烏撒軍民府同知三年守制歸起復赴部時少師大學士邃庵楊公爲尙書見公名曰子清苑知縣邳州知州雷爵乎公曰是也楊公歎曰我爲外臺時過清苑者二過邳州者三歷歷聞子名今老矣大名天下名郡授子爲暮年優游之地公出笑曰大名養濟院邪我七十年孀居嫠婦今再醮乎至大名每行縣蕭然疋馬米疏自隨至南樂知縣鄉人

也饋劉牲數品公却之知縣曰此某之自辨非取之民公曰知縣自辨非同知自辨也終不受時都御史柳泉馬公爲郡守告予曰自雷先生貳大名我雖言語亦不敢輕發況敢妄行一事乎數年間直得一嚴師矣珣防於里人由聊城知縣陞大名府同知貞溥濟里人由山東鄒平知縣陞湖廣漢陽府通判瑄苑洛先生周氏世濟清忠傳有通判瑄僉事道姪廉謹溫醇授廣平府推官陞通判兩任十八年歸之日空囊耳年八十讀書不倦每有未達獨乘一驢來就問予如此數歲霓字世望縣西關人由河南中牟知縣

陞南直隸淮安府通判中牟志稱寬行事忠厚章喜慶里人四川成都府

楊煥韓邦彥今任知縣邦彥副使韓家君名子

煥西莊里人山西太原府陽曲縣邦彥苑洛先生三廉吏傳有鄭州知州韓邦彥字汝哲授儀封知縣儀封稱治守制歸起復授高陽以奏薦調河閒時方議行取有尼之者曰知縣簡傲不恭尙書張公爲御史時會按河閒曰韓知縣居官自有家法應行之禮未曾缺少但無奴顏婢膝耳然竟不果取遷鄭州知州發政皆如儀封時公三尹大縣一典名州歸之日諸朝邑縣志注

卷二

人物三十

三

長春外史

兄弟問俸資若何公曰六十兩諸兄弟未之信也後遭火災諸兄弟於灰中檢得鎔銀如餅權之果止六十兩

王朝雍雷子質程範樊得仁孟填今舉進士朝雍郎中

卷子範縣丞珏子

朝雍字仲和號友山性至孝父卷以言事繫獄雍遍謁諸貴人叩頭求解郟至青腫初授嚴州府推官多所平反作理刑銘嘉靖改元應詔言事諫上勤學禮下節用恤民及革文臣子弟冒濫軍功者行縣不受饋遺自爲市菜和粥人謂之王青菜陞澤州知州庫

人以羨金嘗之立置于法又榜示條約罷不便民者
數事轉懷慶府同知澤人爲立去思碑陞南京戶部
員外郎郎中出爲山西按察司僉事卒于官範字君
儀豪邁不羣初任開封府通判不受饋金丁艱起復
除大名府通判善鉤鉅人稱神明府舊治故天雄鎮
元時圯於河蘓爲茂草範督率民兵樵蘇陶甄不煩
公帑而四門堅完屹爲河朔保障河決杜勝相視水
勢自白屋皮口築隄七十餘里水患遂息鄉人爲立
遺愛碑以勁直不容歸子愔以舉人知黔江縣子質
字伯華安仁里人少時穎慧能詩與五泉先生並稱

朝邑縣志注

卷二

人物三十一

三

長春外史

奇童至正德十六年登進士授潛山知縣未至官卒
京邸填字汝熙或云汝器未仕得仁字恕夫孚祐里
人山西河津知縣徵爲御史嘉靖十九年按正定除
四川布政司參議巡關有功有文綺白金之賜褒曰
忠勞可嘉苑洛先生王氏世德記略曰王氏之先大
梁人自善避亂居朝邑之泊子邨善以下無可考幾
世而生佐佐生聚以材選歷永濟奉新驛丞調全州
局大使聚生斌以邑掾授中牟典史居守官廉中牟
人頌之以子貴贈戶部主事斌生登登進士歷官戶
部郎中蘇州府同知免歸太史王漢陂稱其負志挾

氣吞吐風雲排擊山嶽謂卿相可立致也子六朝璽
字國重母歿廬墓三年朝雍字仲和卽友山子也初
名朝壅丁卯秋試夢甕去底榜出爲今名蓋監臨易
之也授嚴州府推官歷官澤州知州懷慶府同知陞
南京戶部員外郎郎中山西按察司僉事友山子擇
言而發慎行其餘資性英懿才識宏達其治嚴及澤
也法嚴行恕政平訟理上信其賢下懷其惠朝壅字
仲冕丁丑進士三河知縣調鹿邑陞宿州知州未任
卒歲寒顯後彫之資風急見獨搖之操仲冕其人也
朝望字德輝縣學生朝璽字季良乙酉鄉進士獲鹿
朝邑縣志注

卷二

人物三十二

美

長春外史

知縣調永清朝璋國重二子三策生員三獻友山子
六子三省字誠甫癸未進士歷官保定府知府三知
三益三畏俱生員三至三恕仲冕子二三俊生員三
傑德輝子三讓季良子三復朝璋二子三聘三友誠
甫子傳鄉進士登第時年甫弱冠也嗚呼王氏其盛
矣乎自佐翁而下世次刻之碑陰自德輝而上行業
載之誌表茲不詳書云

張我華曰王氏與我兩世諸姻祖姑丈每言泊邨初
有水盈盈如衣帶而城而源頗潔流頗長故王氏累
世簪纓科第蟬聯傳之後又有按察使嗣美布政使

于陞東阿知縣鑰信陽知縣鑠咸居官稱職不忝科名未幾水流漸絕而王氏遂大衰然則堪與之說信有徵乎伊洛竭而夏亡河竭而商亡三川竭而周室東遷噫天邪人邪

餘未仕卒

中曲里王福魯坡里馬駿平羅里王剛防於里安永親賢里張玘受春里周易望仙里孟熊沙底里東陽新時熙知縣能子

王河汀 學謨 稱時熙有口辨亦未仕卒

喬誠許清黃秀孟濟張亨張璟秦禮席慶仇約石秀李朝邑縣志注

卷二

人物三十三

三

長春外史

珍薛義李蓁馬恭張翼党聰李敬李時楊溶楊寶孟震王臣趙璞馬賢唐通馬充韓威上忠楊銘周瓚王瑾劉紹翟祥暢廣程玨吳珣張輔李聰王純翟景陽王訥馬因呂聰王銳孟奎尙貴馬輅俱歲貢

誠清俱洪武時貢時又有王良健兒邨人十七年貢入大學二十四年刑部問事明年以勤能授山東部試主事又明年欽署本部郎中事主事三十年陞都察院右僉都御史授中順大夫月支俸二十四石爲事三十一年謫刑部郎中戶部尙書郁新薦其行能陞刑部右侍郎授嘉議大夫月支俸三十五石良有

墓在健兒邨附箸于此黃秀永樂時貢時又有吳敏
郭明村人官松江知府墓在郭明故知濟亨璟理慶
約石秀珍俱正統中貢義綦翼党聰敬俱景泰時貢
翼同州學恭貢未詳何時時濬寶震俱天順時貢臣
璞賢通充威忠銘瓚瑾俱成化時貢時又有孟釗望
仙里人官兗州府檢校紹祥廣珏珣輔李聰純景陽
訥因呂聰銳奎輅俱宏治時貢祥廣景陽俱同州學
輅縣丞恭子時又有王簡安仁里人同州學貢阿彌
州同知教諭昺子貴永康里人正德時白河縣貢貴
宜列輅下

朝邑縣志注

卷二

人物三十四

早

長春外史

喬誠至山西參政一統志云誠處心忠信措事寬平

安仁里人墓在親賢里

許清至知州

永康里人交南宣江州今無此州

黃秀孟濟秦禮石秀張翼楊濬王瑾暢廣俱知縣

黃秀長春里人直隸廣平府永年縣濟望仙里人山

西解州芮城縣禮續志作理受春里人直隸正定府

無極縣石秀望仙里人縣關翼太奇里人直隸趙州

高邑縣濬望仙里人河南衛輝府胙城縣瑾沙底里

人以祖任直隸涇州大使因占籍漢中府南鄭縣暢

廣續志作楊廣永康里人四川某縣

張亨王臣俱判官

亨樂豐里人山東德州臣沙底里人清州明天下州
設判官從七品無定員里不及三十而無屬縣裁

張璟楊銘李珍薛義趙璞唐通韓威周瓚俱訓導

璟沙底里人藍縣銘永康里人河南開封府河陰縣
今縣省珍受春里人山西汾州府義喜慶里人河南
開封府鄆陵縣璞長春里人山西太原府興縣通江
田里人山西沁州武鄉縣威懷恩里人山西汾州府
介休縣瓚受春里人河南河南府新安縣楊銘應列
朝邑縣志注

卷二

人物三十五

里

長春外史

薛義之後

馬恭程珏李時上忠劉紹俱縣丞紹知府讓子

恭縣闕珏字兩玉長春里人四川叙州府富順縣下
車捕胡遐逋稅千石又捕治巨盜虎刺寶賂以千金
不色動戴氏子有苟合殺三人金多而獄久不成一
訊而決抵厥辜一縣長服有子範時寺后里人河南
懷慶府河內縣忠知縣志弟山東濟南府德平縣紹
山西蒲州臨晉縣據科貢考又有李綦長春里人河
南彰德府安陽縣丞有王近仁無王訥似是一人名
字互舉溥濟里人同州學貢山東東昌府知事陞河

南彰德府內黃縣丞志皆缺載

党聰李敬俱衛經歷

党聰續志作驄步昌里人江南寧國府敬喜慶里人
江南揚州府聰敬俱府經歷衛疑府字之譌明天下
府設經歷司經歷一人正八品

楊寶州同知

親賢里人河南鄭州明天下州設同知從六品無定
員里不及三十而無屬縣與判官俱裁有屬縣裁同
知

馬賢府照磨

朝邑縣志注

卷二

人物三十六

里

長春外史

安仁里人四川馬湖府今日馬邊廳屬叙州府

馬因州吏目

安仁里人湖廣荊州府夷陵州明志知州其屬吏目
一人從九品

餘不仕卒

長春里席慶永康里仇約西莊里孟震安仁里馬充
安仁里翟祥平羅里吳珦懷恩里張輔高家里李聰
江田里王純安仁里翟景陽溥濟里呂聰續志作吳
聰後改平利縣貢懷恩里王銳望仙里孟奎安仁里
馬輅永康里尙貴

蔚能吏員至光祿寺卿禮部右侍郎能有廉操歷官不營產業卒賜諭祭

明史選舉志選舉三途吏員第三太祖吳元年置宣徽院設院使正三品洪武元年改宣徽院爲光祿寺使爲卿正四品十三年禮部置左右侍郎各一人正三品能受春里人字惟善宣德元年出吏員授光祿寺典簿陞寺丞正統十四年隨駕北征舉總督左掖軍務景泰初以功陞本寺卿賜錦衣金帶以旌其忠天順初進禮部右侍郎歷事五朝廉能謹慎後以忤旨調南京光祿寺卿續藏書況鍾傳後曰能在光祿

朝邑縣志注

卷二

人物三十七

聖

長春外史

三十年未嘗持一禁嚮歸家嘗偕僚聯名疏請查入內供應器皿下禁獄問所由能奮曰上怒不可測能老矣當獨任不以累諸公也獨受責降官論者謂以吏奮身如能與況鍾者殆士人高等何可以資格拘也王河汀學謨曰蔚公起功曹無論致身通顯卽其廉節終始不易而任罪受罰不累同署最稱長厚卽博詩書譚理學者不加於此鄉賢削祀吾不知其何說矣

張我華曰今太平邨王蔚邨縣城馬院皆有蔚氏皆稱能後皆有宗伯祠明德多嗣理固宜然然馬院則

有光祿畫象豐頰龐眉藹藹然厚德君子也帶閒懸
有牙牌是京師寺卿時所畫先是有王楫者元時人
字濟川家秦邨經儒門習法律吏於 城興元二路
選陝西理問所令史累遷朝列大夫秦州知州踰年
乞休以中議大夫同知奉元路總管府致仕翰林編
修太子文學曲江張冲志稱天歷兵興關陝大荒楫
同汪司徒均布國澤期盡拊救之方灌州洞蠻耗邊
贊議招安邊徼寧謐及知秦州民罹饑饉荒政又最
他處卒葬秦邨此在蔚公之前志未錄

尉遲閏王式賈訥仇名善俱洪武中以人才徵閏至通
朝邑縣志注 卷二 人物三十八 四 長春外史
判王式賈訥至知府仇名善至知縣

明太祖洪武六年罷科舉令有司察舉賢才以德行
爲本而文藝次之其目曰聰明正直曰賢良方正曰
孝弟力田曰儒士曰孝廉曰秀才曰人才曰耆民皆
禮送京師不次擢用閏平羅里人福建興化府式受
春里人清江府訥永康里人知府未詳名善永康里
人直隸保定府安肅縣時又有張九成洪武十五年
以人才爲山東新泰知縣上給敕諭信符歷九年考
績封承事郎初任會歲侵捐俸賑饑特獎廣愛邑宰
周彧洪武中上書求仕進上名與語大說乃授觀察使

或舉劾無所避于是百僚皆畏觀察使俄遷吏科給事中同東宮治秦邸獄歸乃陞通政使以讒下獄藉其家得衣一襲俸米數升上召問曰通政官尊祿厚何大貧邪或叩頭曰臣以草茅待罪九卿自知無功能不稱任使所得俸不敢盡受皆歸之官耳已而通政司乃上或所歸俸金上知其枉赦之因賜錦衣二襲寶鈔若干或沒上歎曰周或難得朕用之不盡其才也

明太祖勅中書省自今有能上書陳言敷宣治道武略出衆者參軍及都督府具以名聞故或上書求仕進觀察使未詳置罷洪武二十四年定吏科給事中

四人正九品通政使司通政使一人正三品苑洛先生周氏世濟清忠傳有通政使或說與志異曰或廉直敢言每有論劾必箸緋衣諸大臣每早皆使人候公長安門外見公緋衣各令取素衣角帶爲待罪具當視朝果有論糾糾者必得罪如此數歲貴近多忌公有譖公貪者上怒公下獄死命藉其家惟米數斗布衣數件召公夫人問曰從或廉無俸金邪夫人曰或自謙不能盡忠故俸稍不入於家寄本司庫中頃之司上或俸金上悟大怒立誅譖公者以金給公家命沿途有司致祭復其官

劉偉田隆王朝璽蘇民望皆親喪廬墓三年偉仕監察御史璽望今納銀爲監生

偉已見王河汀

學謨

曰偉好弈適而翁來色不懌偉

終其身不弈爲御史銜命清戎河南至宜陽聞母病未及上疏遄歸得母子一訣至今言孝必稱劉氏朝璽郎中登長子已見上注隆民望未詳明史選舉志捐貲入國學者曰例監

嗚呼節義人之大閑也豈非人之自立於世者歟吾觀世之達人通士號稱知道翩翩然以自異於世夫其日日稱說仁義不離口其自負豈在婦人女子下哉然竊朝邑縣志注

卷二

人物四十

巽

長春外史

觀其所以不逮遠矣吾邑有劉烈女者龍門邨人女也成化中父母許婚楊氏楊氏子死女乃素服涕泣不食將臨其夫喪家人咸非笑之有舉人偉者女族兄也女往質焉偉曰汝所爲誠是奈世俗何女曰吾所爲求是而已矣奚以世俗爲然家人竟止女不得往臨其夫喪女乃自縊死嗚呼斯人者蓋所謂建諸天地而不悖質諸鬼神而無疑百世以俟聖人而不惑者也嗚呼烈矣

嘉靖初知縣郃公

相

建劉烈女祠堂三間門房一座

苑洛先生爲之記文與志同不錄祠堂今改爲節孝祠在望獄門內龍門邨在縣北二十里邨西有烈女

墓

節婦則蔚太淑人薛氏

光祿能母

韓太宜人張氏

贈都御史顯妻副使紹宗母五泉先生祖母也成化中旌表苑洛先生韓氏三世貞節傳曰先祖母張太淑人年二十七先祖贈都御史府君卒先君生纔數月祖母性剛嚴先伯父年幾五十怒輒撻之病革已易簣就正寢忽張目呼子曰邦奇幾乎忘却一言我死後無與爾祖父同穴問何故曰我節婦也豈可與朝邑縣志注

卷二

人物四十一

七

長春外史

男子同穴予對曰正爲我祖父守節正當同穴又曰汝仔細商量無致人恥笑也

馬宅妻王氏

宅元初人宅死王氏年十九守節延祐元年旌表

張三妻師氏

明洪武中旌表

王亨妻靳氏

此別一王亨非由義之祖父也成化中旌表

韓迪妻楊氏楊質妻張氏韓繼宗妻雷氏

迪妻楊質妻張俱未詳苑洛先生韓氏三世貞節傳

有雷氏年二十五夫韓繼宗卒遭繼姑之虐怒輒以
簪刺其股肱流血淋漓又遭惡叔凌害百端竹罄南
山晝理生事夜則閉門慟哭徹夜有司上其事聖旨
旌表其門坊價已領時值饑饉食費之坊牌至今未
建雷氏大名府同知爵之妹也爵清修苦節老而彌
篤可謂難兄難妹矣

雜記第七

漢莊熊羆言臨晉民願穿洛以溉重泉以東萬餘頃使鹵地誠得水可令晦收十石于是發卒萬餘人穿渠引洛水至商顏下

使史記作故晦下無收字發上有爲字引上有自徵二字重泉故城在大荔西北蒲城東南各相去四十五里鹵鳥鹵今日鹹地臨晉洛注見上商顏見漢書溝洫志卽鐵鎌山韓昌黎次鄧州界詩有商顏暮雪逢人少之句此自商鄧閒地顧嗣瑛誤引此條以解商顏不審甚矣史記至商顏下下又云岸善崩乃鑿井澗者四十餘丈往往爲井井下相通行水水類以絕商顏東至山領十餘里閒井渠之生自此始穿渠得龍骨故名曰龍首渠渠址今未詳所在

唐太宗貞觀四年駕幸鹽池經朝邑賜朝邑民今年田租

太宗在位二十三年貞觀一元幸鹽池者一十二年二月丁卯觀鹽池庚午如蒲州甲戌如長春宮免朝邑今歲租賦降囚罪乙亥獵于河濱四年未詳鹽池昔日路邨今日運城在山西解州東西四十里南北十五里有都轉鹽運司

國朝正德庚午朝邑民周雄言朝邑縣東北故有鹹灘萬餘畝近年河水淤漫頗堪耕種當同常田徵稅巡按御史王廷相議曰朝邑鹹田雖暫堪耕種難保將來若便同常田徵稅將貽禍無窮乃不徵今鹹田果不可耕如御史議云

庚午正德五年也鹹灘注見上王廷相字子衡儀封人宏治中進士選庶吉士授兵科給事中正德初劉瑾中以罪謫亳州判官量移高純知縣召爲御史己出按陝西裁抑鎮守中官廖堂被誣逮繫謫贛榆丞屢遷四川僉事山東副使皆提督學校嘉靖二年遷

朝邑縣志注

卷二

雜記二

辛

長春外史

山東右布政使以右副都御史巡撫四川尋召理院事歷兵部左右侍郎遷南京兵部尙書參贊機務入爲左都御史奏解魏國公徐鵬舉兵柄加兵部尙書兼前官提督團營加太子少保從幸承天還加太子太保雷震奉先殿廷相言人事修而後天道順大臣法而後小臣廉今廉隅不立賄賂盛行先朝猶暮夜之私而今則白日之攫臣職憲紀不能絕其弊乞先罷斥用以刺尙書嚴嵩張瓚輩後斥爲民卒隆慶初復官贈少保諡肅敏

正德戊寅朝邑民張某言朝邑太陽諸里民田圯于河

幾萬餘畝乞議處田稅巡撫都御史鄭公移縣視狀知縣陵川王君請曰誠如民某言所圯田稅宜從輕領都御史可其議于是田以糧拆布者凡若干畝

戊寅正德十三年太陽里屬長春鄉有二陽社東西陽邨俱沒於河鄭公名陽直隸安肅人王君名道詳見後

關中南有肴函之固

自函谷關以西總名關中肴山名字或作殺峭又名嶽崆有二陵在河南陝州東東峭長阪數里峻阜絕澗車不得方軌西峭全是石阪十二里險不異東峭

朝邑縣志注

卷二

雜記三

至

長春外史

也函函谷關也秦函谷關在河南靈寶縣西二里西至潼關二百里程大昌曰路在谷中深險如函故名東西四十里絕岸壁立實爲天險漢函谷關在河南新安縣東一里武帝時楊僕所築然肴函俱在關中之東戰國策蘇秦亦曰東有殺函之固曰南未詳北有蕭榆之塞

蕭關名在平涼府鎮源縣西北一百四十里榆卽史記衛青傳所謂榆谿舊塞也明置榆林衛有長樂堡分轄雙山等十二營堡爲中路有神木堡分轄鎮羌等九營堡爲東路西有安邊營分轄永濟等十二營

堡爲西路北有遺牆成化九年築長一千七百七十餘里東起清水營接山西偏頭關界西抵定邊營接寧夏花馬池界今榆林延安二府地

西阻棧道

棧道閣道亦曰連雲棧在褒城縣東北崔浩曰險絕之處傍鑿山巖而施板梁爲閣

東據黃河

自榆林府葭州綏德州延安府同州府至潼關皆東倚河

古稱四塞之地故曰秦得百二焉

朝邑縣志注

卷二

雜記四

五

長春外史

四塞東函谷南武關西散關北蕭關也史記或說項王曰關中阻山河四塞漢書作阻山帶河四塞之地史記田官曰秦形勝之國帶山河之險縣隔千里持戟百萬秦得百二焉蘇林謂二萬人足當諸侯百萬人虞喜謂百萬當二百萬程大昌從虞說然河自夏陽而北兩岸山領陵複不可以師兩岸山岡磅礴數千里林麓蒼黝谿澗鏤錯其水尙崩浪萬尋縣流千丈渾洪轟怒鼓若山騰濬波顏疊迄於下口方知慎子下龍門流浮竹非駟馬之追也酈道元說夏陽而南經朝邑至潼關凡百里率平曠易渡

東西原隰相距數十里百里不齊皆漫衍無高岸也故漢祖往來關中嘗由臨晉而七國謀反亦欲由臨晉入兵

漢二年三月漢王從臨晉渡七國吳膠西膠東甯川濟南楚趙也吳王濞反使遺諸侯書有云齊諸王與趙王定河閒河內或入臨晉關或與寡人會雒陽是朝邑者關中之隙道也故一方不戒三險俱失矣
三險有函蕭榆棧道也

正德己卯知縣陵川王君言朝邑爲山陝要衝與蒲華等然朝邑獨無驛所又近時河南應驛者率避潼關而朝邑遂爲三省之滙朝邑民不任供送于是巡撫都御史鄭公下其事乃以郃陽馬騾二十夫百人澄城馬騾十有五夫八十人協濟朝邑

朝邑縣志注

卷二

雜記五

三

長春外史

己卯正德十四年也縣舊有朝邑驛故趙抃記謂新市路當秦晉要衝自唐宋以來名臣賢士經由往返莫不稅駕投榻于此不知何時驛廢而民乃不任供送之役矣陵川王君後萬歷中又停郃陽澄城協濟夫馬至今雖無旌節往來而赭衣流遣之徒新疆謫戍之輩率以春秋二時由永濟河東驛徑大慶關以達華陰潼津驛夫馬供給不勝其苦甚則脫輿夫之

駕解犁轅之駒停征人之轡者有矣關差之外重有
是累安得如陵川王君者又一言之也

朝邑縣志後序

右朝邑志七篇工部員外五泉韓汝慶之所編也紀錄質實而文彩煥炳可誦其傳人物說高翔程濟及烈女劉氏事婉乎若覩其人真足以廉頑而立懦不可謂無筆力也而雜記一篇又多政事利害所關以示後之爲朝邑者何惑焉其餘五篇事雖不異他志而紀例亦自殊稱爲簡確之編信矣然則陵川王君純甫知是邑而刻此編人雖曰不良于政則吾不信也正德己卯秋七月廿二日賜進士及第翰林院修撰儒林郎同修國史經筵講官高陵呂柟書

朝邑縣志注

後序一

一
長春外史

柟字仲木高陵人居涇水之陽學者稱涇野先生未總卹卽志聖賢之學危坐朗誦小屋中祁寒酷暑不踰戶限正德三年中會試第六人廷試擢第一爲翰林修撰逆瑾擅權柟雖同鄉獨不往且却其賀瑾不堪又因西夏事疏請帝入宮親政事潛消禍本瑾怒欲殺之引疾去歸杜門力田養親若將終身焉瑾誅以薦復官上勤學疏謂文王緝熙敬止咸和萬民斯享臺沼之樂元順帝廢學從欲太祖一舉而取之可爲深戒乾清宮灾應詔陳六事其遣去義子番僧取回鎮守太監尤人所不敢言父病歸及其卒也自成

服奠葬遷柩題主及卒哭三虞大小祥禫斟酌損益各有儀注楊東江輩葬父母咸踵其遺意而行之鎮守太監賻以金幣立却之客有托交游以三百金求書者則峻拒之曰人心如青天白日奈何以禽獸相視也世宗立首召柟上疏勸勤聖學以爲新政之助大禮議興與張桂忤以十三事自陳中以大禮未定諂言日進引爲已罪上怒下詔獄謫解州判官攝行州事恤災獨減丁役勸農桑興水利築隄護鹽池行呂氏鄉約及文公家禮求子夏後建司馬溫公祠正首陽夷齊墓察孝弟節義者標題其門四方學者日

文簡柵受業渭南薛敬之接河東薛瑄之傳學以窮
理實踐爲主官南京與湛若水鄒守益共主講席仕
三十餘年座止圖書室無妾媵終身未嘗有偷語惰
容時天下言學者不歸王陽明則歸湛若水獨守程
朱不變者惟柵與羅欽順云所著有四書因問易說
翼書說要詩說序春秋說志禮問內外篇史約小學
釋寒暑經圖解史館獻納宋四子鈔釋南省奏稿涇
野詩文集

朝邑縣志跋

道始至蒲臨河而西望朝邑卽壯其山河之美比入境左唐闕右隋宮盡覽其古跡之勝比入郭閭里輝聯後先掩映則又歎其人物之秀且盛而果非他邑比也顧其邑志繁蕪汗歲不足以彰往而詔來道乃請諸五泉韓先生作此新志焉其去舊志雖省三之二然而爬羅剔抉昭昭乎可激勸于人者不啻加千百也旣而又得對山康先生涇野呂先生序諸前後則斯志也滋可傳諸木以爲斯邑實籍矣若夫企先賢而思齊覩名宦而思政慨風俗而思移易觀利病而思興革則又後之有志者事也于道何有哉皆正德己卯九月吉旦知朝邑縣事山西陵川王道跋

朝邑縣志注

跋一

長春外史

道字純甫山西澤州陵川人澤州今陞府陵有六泉故號六泉氏由舉人正德十二年授朝邑知縣至則嚴捕緝故盜賊息明聽斷故詞訟簡清荒稅故貧困蘇崇文獻故典籍具服上禮下故聲稱洽吏部推陞臨洮府通判嘉靖五年轉河南府通判河南多盜設判捕之道知盜故敝令曰里人弗發覺者有常刑受命弗戮力者有常刑以賂故縱者有大刑怙勢藏匿者有大刑以是四境克寧久之棄官歸嘉靖八年卒

年五十四

朝邑縣志注

跋二

二

長春外史

朝邑縣志注自序

朝邑張氏曰鵬翼避紅巾之亂自山西洪洞來奔居縣東長春鄉之東陽邨是爲長春張氏其先蓋出于黃帝子少昇青陽氏第五子揮爲弓正始制弓矢子孫賜姓張氏中葉有仲周宣王時孝友美見于詩後裔事晉世爲大夫有侯老趨幣三卿分晉在趙曰談在魏曰旄曰丑在韓曰去疾曰譴雖俱顯三晉而世系莫可得而考焉烏呼揮仲之後不知何自而有鵬翼公者鵬翼公子孝忠生子翥翥生蕤蕤生翔翔生夢麟夢麟生騰桂贈中憲大夫湖廣漢陽府知府知府始讀書爲士人嘉靖

朝邑縣志注

自序一

一 長春外史

三十四年地震之變知府攜妻陳太恭人自東陽邨遷于白冢再徙潼關卒遂葬焉有子綸音中萬歷二十九
年張以誠榜進士歷官南京戶部郎中出爲湖廣漢陽
府知府尋遷按察司副使屯鹽道致仕歸白冢人稱白
冢張氏天啓二年卒卒二十二年而有甲申之變提學
乃遷居縣南門人又稱南門張氏提學諱好奇字平子
號知天副使中子也順治五年舉于鄉九年登鄒忠倚
榜進士起家河南鞏縣知縣鞏人立生祠歲祀之入爲
戶部主事陞員外郎遷刑部郎中康熙十一年主考福
建明年轉河南按察司僉事提督學政敬歷中外廿餘

年及卒家無餘貲享壽七十有八歲葬小伏坡與副使同隴又與副使同祀鄉賢祠提學二子長贈文林郎山東觀城縣知縣述祖次儒學訓導纘祖訓導生生員毓琮璧九璧九生鄉知縣生生員毓珣珣獻東獻東生生員大錦成九是爲浪園先生初璧九子鄉殤以浪園先生爲子旣璧九室李曰獻東之世不可絕也別爲浪園先生娶於江都李氏生元觀實我華遂以爲璧九後其生也浪園先生以周易筮之遇觀三三之漸三三曰是謂觀我生進退此其識通塞之義乎善用觀也命之曰元觀歎曰能以正進可以正邦也觀已之所行進退不失

之推遺迹闕郭有道碑文道平陽渡河於蒲旣而訪友
長安賣嵯興平謁茂陵往來馬嵬扶風詢班馬遺文董
生下帷之處如是者數年五十五年乃築室縣西關秦
安堡古之長春宮也奉母北堂閉門守拙蓋將有終焉
之志矣如是者又數年五十九年有事于河北知藁城
整庠路命卿延致幕館非其好也嘉慶改元歸自正定
夏五酷暑獨坐一室讀五泉先生朝邑志而嘆曰斯志
也簡覈爾雅利病俱陳可以範世可以惠民雖古良史
何以加焉王漁洋與康對山武功志並稱之洵文章之
宏麗者也獨是先生以命世之才操良史之筆辯而不
朝邑縣志注

自序三

三

長春外史

華質而不俚古雅沖淡非注莫明武功志孫酉峰太史
箋評板行矣斯志也可無傳乎於是不辭固陋詳加校
正兼采經史百家先儒之說及續後二志集而注之惟
拓其義不具書名其或文有隱約則詳引衆說闕其所
疑時見微意有所裨補務在翼贊志文不作矛盾仍用
漢人經解之例志注別行庶五泉先生妙才快筆不爲
注文隔斷耳所媿妄言末學蕪蕪舊章古人譬之疇星
之繼朝陽良用忸怩計兩閱月脫藁凡三萬四千六百
六十九言藏諸篋笥時自披閱若好古博雅君子與我
同志亦無隱焉嘉慶元年歲在丙辰秋七月甲辰朔旦

長春外史張我華元觀父書於瑞石山房

朝邑縣志注

自序四

四

長春外史



